

四庫全書

史部

欽定四庫全書

建康實錄卷十七

唐 許嵩 撰

梁

高祖武皇帝

高祖武皇帝姓蕭諱衍字叔達小字練兒蘭陵中都人漢相國何之後而與齊朝同承淮陰令整整生皇高祖鎔位濟陰太守鎔生皇曾祖副子位州治中從事副子

生皇祖道賜位南臺治書侍御道賜生皇考順之字文
緯齊高帝族弟參預佐命封臨湘縣侯歷官侍中衛尉
太子詹事領軍將軍丹陽尹贈鎮北將軍高祖以宋
孝武大明八年甲辰歲生于秣陵縣同夏里三橋宅初
皇妣張氏常夢抱日已而有孕乃生帝帝生有奇異之
光兩髀胼骨狀貌殊特頂上隆起日角龍顏重嶽虎顧
舌文為八字項有浮光身映日無影為兒童能蹈空而
行有文在左手曰武及長博學多通好籌畧有文武才

幹流輩咸推許焉所居宅常有雲氣人有過者體輒肅然起家巴陵王參軍遷衛軍王儉府東閣祭酒王儉一見深相器異請為戶曹屬謂廬江何憲曰此蕭郎三十內當作侍中出此則貴不可言竟陵王子良開西邸招文學之士高祖與沈約謝朓王融蕭琛范雲任昉陸倕等並遊焉號為八友王融俊爽識覽過人尤敬異高祖每謂所親曰宰制天下必在此人累遷隋王諮議行經牛渚逢風入泊龍瀆有一老人謂曰君龍行虎步貴

不可言天下將亂能安之者其在君乎以皇考艱去職
齊明帝輔政為寧朔將軍鎮壽春服闋拜黃門侍郎入
直殿省與蕭湛等定策封建陽侯建武二年虜寇司州
以高祖為冠軍討之進戰魏軍棄圍走還為太子中庶
子領羽林監頃之出鎮石頭四年敗魏軍於雍州進使
持節雍梁南北秦四州軍事雍州刺史其月齊明帝崩
及東昏侯立而揚州刺史始安王遙光尚書令徐孝嗣
右僕射江祐將軍蕭坦之侍中江祀衛尉劉暄更直內

省使分日帖勅世所謂六貴高祖聞之謂從舅張宏策
曰政出多門亂其階矣詩云一國三公吾誰適從況此
六貴也又有御刀茹法珍梅蟲兒豐勇之等八人號為
八要及舍人王暄之等四十餘人皆口擅王命權行國
憲今有六貴而何得理嫌隙若成方將誅滅當今避難
唯有此地但勤行仁義可坐作西伯然諸弟在都恐不
離患須與益州圖之時高祖長兄懿罷益州還仍行潁
州事使宏策詣都陳計於懿云晉惠庸主諸王爭權遂

內難九興外寇三作今六貴爭權人握邦憲制主畫勅
各欲專威始安將為趙倫形迹已見蹇人上天信無此
理乎徐孝嗣才非柱石聽人穿鼻幸圖身計不可後人
智者見機無待終日懿聞色變心不之許是歲高祖到
襄陽潛造器械伐竹木於檀溪密為舟楫之備所住齋
常有五色氣迴轉狀若蟠龍其上紫雲騰起形如繖蓋
望者莫不異焉永元二年冬懿被害信至高祖密召長
史王茂中兵呂僧珍別駕柳慶遠功曹史吉士瞻等謀

之以十一月乙巳召僚佐集於廳事謂曰武王會孟津
皆曰紂可伐今昏虐暴主誅戮朝賢生民塗炭卿等同
心嫉惡共興義舉良在茲日是日建牙於軍門收拾甲
士三萬餘人馬一千匹船三百艘高祖謂張宏策曰夫
用兵之道心戰為上兵戰次之乃使行人封空函以疑
劉山陽而定荊土引荊州軍下沔南立新野郡以集新
附三年二月南康王寶融為相國以高祖為征東大將
軍封公給鼓吹一部戊申高祖發襄陽留弟偉守城總

州府事錄事郭儼知轉漕移檄京師命長史王茂與景陵太守曹景宗為前將軍出漢口輕兵沿江逼郢城大破刺史張冲軍於石橋追斬於九里亭高祖築漢口城以守時張冲軍復以長史程茂為主己巳南康王寶融即帝位於江陵改永元三年為中興元年遙廢東昏為涪陵王以高祖為左僕射假黃鉞西臺置百官司馬七月襲破上流征鎮相繼歸欵九月留長史鄭紹叔守江州前軍次蕪湖南豫州刺史申胄棄姑孰奔歸東昏又

使屯破墩高祖悉大軍據姑孰使曹景宗蕭穎達領馬
步進屯江寧東昏征虜將軍李居士率馬步逆戰擊破
之進與新亭城主江道林大戰於路生擒之而次新林
使王茂進據越城曹景宗據皂莢橋鄧元起據道士墩
陳伯之屯籬門李居士收散軍猶據新亭壘請東昏燒
南岸邑屋以開戰場自大航以西新亭以北蕩然矣十
月石頭軍主朱僧勇率水軍二千歸義東昏又遣征虜
將軍王珍國率胡虎牙等列陣於航南大路珍國決死

戰大敗投淮死者與航等追兵乘之以濟諸軍相望大潰追至宣陽門東府石頭白下等諸軍並降壬午高祖鎮石頭命衆軍圍城十一月東昏悉燒門內驅逼營署官府並入城有衆二十萬高祖築長圍逼之十二月丙寅旦兼衛尉張稷北徐州刺史王珍國斬東昏首送高祖遣使曉喻南徐兗及四方屯戍悉降乃分遣宗黨鎮守而使呂僧珍勒兵封庫及圖籍嬖庶兇黨王咺之已下四十八人並誅之宣德皇后下令追廢涪陵王為東

昏侯依漢海昏故事授高祖中書監揚徐軍事大司馬
錄尚書驃騎大將軍揚州刺史封建安公食邑萬戶給
班劍四十人假黃鉞依晉武陵王司馬遵承制故事已
邠高祖入屯閱武堂下令曰皇家不造遭此昏凶禍延
動植虛被人鬼社稷之危幾於累邠吾身籍皇宗曲荷
先顧受任邊疆推轂萬里投袂受戈克殄多難凡厥負
釁咸與惟新可大赦天下唯王暉之已下四十八人不在
原例又下令曰一切淫刑濫罰賦役並原赦今明昏遽

運大道公行思治之氓來蘇茲日

二年正月齊和帝自江陵遣侍中席闡文兼黃門侍郎
樂法才慰勞京邑追贈高祖皇祖散騎常侍皇考侍中
戊申宣德皇后臨軒入內殿大司馬承制百僚致敬如
前詔進高祖劔履上殿入朝不趨贊拜不名加前後羽
葆鼓吹置左右長馬從事中郎掾屬各四人尋進相國
封十郡為梁王備九錫之禮加璽綬遠遊冠位在王公
之上加相國綠綬綬任總百司高祖固辭二月府寮勸

進是日焚東昏淫奢異服共六十二事於都街乙丑南
隊主陳文興於城內鑿井得鏤麒麟玉璧水精環各二
枚又鳳皇見建康縣桐下里宣德皇后稱美符瑞歸于
相國府丙寅詔梁國初建可依舊選諸要職悉依天朝
之制高祖上表曰臣聞以言取士士飾其言以行取人
人竭其行所謂才生於世窮達惟期而風流遂行馳騫
成俗媒孽誇衒利盡錐刀遂使官人之門肩摩轂擊豈
直暴蓋露冕不避寒暑兼乃戢屨杖策風雨必至良由

鄉舉里選不師古始請自今選曹精加隱括依舊立簿
使冠履無爽名實不違庶人識涯涘造請自息且聞中
間立格甲族以二十登仕後門以過立試吏豈所以弘
獎風流希向後進此實巨蠹尤宜刊革詔依表施行丙
戌詔進梁公爵為王以豫州之南譙廬江江州之尋陽
郢州之武昌西陽南徐州之南瑯琊南東海晉陵揚州
之臨海永嘉十郡益梁國并前為二十郡帝固辭有詔
斷表相國左長史王瑩等率百寮敬請正月辛卯延陵

縣華陽邏主戴車牒稱云十二月乙酉甘露降茅山彌漫
數里正月己酉邏將潘道益於山石穴中得毛龜一三
月辛酉邏將徐靈符又於山東見白麋丙寅平旦山上
雲霧四合須臾有玄黃色狀如龍形長十餘丈乍隱乍
見久乃西北昇天壽張縣見麒麟一物己未夜郢城有
一物如獸色白而長攀樹而泣若將別者因投城外黃
鶴磯水中庚申郢州降梁梁王曰何意罵義軍朱曉曰
明公試思桀犬何嘗不吠堯王以為知言丙午命王冕

十有二旒建天子旌旗出警入蹕乘金根車駕六馬備
五時副車置毛頭雲罕樂舞八佾設鍾簾宮縣王妃王
子王女爵命進號依舊儀丙辰齊帝禪位于梁王王即
位于姑孰依唐虞晉宋故事四月辛酉宣德太后下令
曰憲章前代敬禪神器於梁明可臨軒遣使恭授
璽紱壬戌遣使持節兼太保侍中中書監兼尚書
令汝南縣開國侯亮兼太尉散騎常侍中書令新吳
縣開國侯志奉皇帝璽紱受終之禮王其陟元后君臨

萬方式傳洪業以答上天之休命高祖抗表陳讓於是齊百官豫章王綝等八百一十九人及梁臺侍中臣雲等一百一十七人並上表勸高祖謙讓不受太史令蔣道秀陳天文符讖六十四條事並明著羣臣等固請乃從之夏四月丙寅高祖即位南郊設壇柴燎告類于天禮畢備法駕還建康宮太極前殿大赦天下改元中興二年為天監元年

天監元年壬午封齊帝為巴陵王全食一郡一依齊典

行齊正朔降宣德太后為齊文帝妃后王氏為巴陵王
妃詔降前代王公封爵悉皆除省唯宋汝南王不在除
例追尊皇考為文皇帝廟號太祖皇妣張氏為獻皇后
妃郝氏為德皇后謚兄懿為長沙王詔封文武各有差
以弟宏為臨川王揚州刺史弟秀為安成王弟偉為建
安王弟恢為鄱陽王弟憺為始安王詔後宮樂府一切
放還戊辰巴陵王薨於姑孰謚為和送終一依宋順帝
故事詔分遣內侍周省四方觀政舉淪滯求遺隱問百

年蜀獄訟天下有罪許人贖論復蘭陵武晉縣依前世之科乃立公車府謗木肺石傍各置一函欲有橫議投謗木函五月江州刺史陳伯之舉兵反使王茂為征南將軍江州刺史討平之伯之奔魏丁未詔中書監等八人叅定律令林邑國于阇利國各遣使貢方物十一月乙未立小廟甲子立皇子統為太子是歲旱米一斗五千文人多餓死立長干寺

原案寺記寺在林陵縣東長干里內有阿育王舍利塔梁

朝改為阿育王寺昔佛涅槃後周敬王朝阿育王造八萬四千舍利塔此其一焉又案梁書大同二年八月高

祖改阿育王塔塔下舍利及佛爪髮髮青紺色衆僧以
手伸之隨手長短放之則旋屈為蟲形此塔比吳朝因
孫緝亂魯毀廢之塔亦同泯平吳後諸道人於舊所建
立焉晉末宋初更修飾之至簡文咸安中使沙門程安
造小塔未成而亡弟子僧明繼而修立至孝武太元九
年上金相輪及承露盤其後離石縣人劉薩阿因死更
蘇便出家名惠達行禮次至丹陽未知阿育王塔處乃
登城四望見長干里有異氣因就禮拜果見先置塔所
方知必有舍利乃對衆掘地一丈得三石碑各長六尺
中碑下有鐵函函內有銀函函內又有金函盛三舍利
及爪髮各一枚髮長數尺即選比丘簡文所造四層十
六年又使沙門僧尚加三層即高祖所開者也高祖初
穿三四尺得龍甲九尺許方得石石下有石函函內有
鐵壺以盛銀坬坬內有金縷罌盛三舍利如粟粒大圓
正光潔又有瑠璃椀椀得四舍利及爪髮爪有一枚為
沉香色高祖至寺大會造二刹各以金罌及罌重盛舍

利爪髮內七寶塔中又以石函盛寶塔分入剎下二塔
俱放光明勅鎮東將軍邵陵王綸製寺大功德碑文晉
咸和中丹陽尹高悝行至張侯橋見地中有五色光長
數尺不知何怪乃令人於光處剖視之得金像悝乃下
車載像至長干巷首牛不肯進悝令御人任牛所之牛
直牽車至寺悝因留像付僧每至中夜嘗放光明又聞
空中有金石之響經一歲臨安縣漁人張係世於海口
忽見有銅花跌浮水上係世取以送縣縣以送臺乃施
於像足宛然相當又晉簡文咸安元年交州合浦縣人
董宗之採珠投水底得光焰交州押送臺以施像上又
合焉自咸安歷隆安二十餘年光趺如其初高悝得像
後西域有胡僧五人來詣悝曰昔於天竺得阿育王所
造像來過鄴下值寇亂埋像於河邊尋失所在五人嘗
一夜夢像語曰吾出江東為高悝所得悝乃送五僧至
寺諸僧見像歡歎流涕像便放光耀燭殿宇又瓦棺寺
僧惠邃欲模寫像形寺主僧慮虧損金色謂邃曰若能

請像放光回身西向乃可相許也遂便懇拜請之其像即轉坐放光西向當便模之又銅花趺上先有外國書莫有識者後有三闕鄒跌摩識云是阿育王為第四女所造也及梁朝勅除市側數百家以廣寺闕堂殿樓閣頗極輪奐其圖諸經變相並是張僧繇闕之功為其冠絕陳亡寺內殿宇悉皆焚燼今見有石塔三層高一丈二尺闕尺形狀闕非人工焉鳥雀不敢棲息西京記光福寺大興寺殿內有闕像門梁陳數有奇異陳國亡忽面自西向雖止之還爾隋文帝載入闕內中供養後移置此寺寺眾以殿大像小不可當陽置之於北面明日乃自轉正闕咸驚異復置北面明還復轉南面眾乃懺謝不復更動又靖安闕崇闕寺有石像一軀高五尺製作麓惡甚有靈驗傳云是阿育王第四女所造也其女貌醜嘗自慨恨多作佛像及成皆類如此千數乃至誠祝禱忽感佛見形更造諸像相好方具其父使鬼神遍散諸像於天下

此石像是其一也

天監二年四月癸卯尚書剛定法度上梁律二十卷科

四十卷扶南龜茲中天竺國各遣使貢方物交州進鸚

鵡能歌不納置法王寺北去縣二十里

原案塔寺記武帝造其地本號

新林前代苑也梁武義軍至首祚王業故以法王為名大同九年於寺側起王遊苑尚書令沈約為寺碑文美武

功也置永建寺北去縣六十里李師建造置佛窟寺北去

縣三十里僧明慶造其寺拓山巖殊補形勝遂因佛窟

而名置永修觀東南去縣五十里五月六日武皇帝造

至貞觀六年廢

三年天下多疾疫

四年正月癸卯詔自今九流常選年未滿三十不通一經不得解褐五月建康縣定陰里生嘉禾一莖十二穗六月立孔子廟十月大舉北伐十二月天清朗西南有電光聞雷聲者三歲大穰穀一斛三十文置敬業寺禮部侍郎盧法振造

五年正月丁卯詔凡諸舊族無在朝位者選官搜括四

月丙申廬陵高昌之仁山獲銅劍二始豐獲八目龜一
置淨居寺北去縣六十二里潁州刺史劉威造

六年詔隱淪之士皆令自陳三月有象入京師四月置
左右驍衛左右遊擊將軍七月甲子太白晝見丙寅置
桂州八月戊戌大風折木京師大水濟入加御道七尺
乙亥改閱武堂為德陽堂聽訟堂為儀賢堂置光宅寺
西去縣十里武帝捨宅造寺未成於小莊嚴寺造無量
寺像長一丈八尺及鑄銅不足帝又給功德銅三千斤

臺內送銅未至像處已見銅車到鑪所於是就冶一灌便足在後臺司銅至方知向來送銅靈感所致及開模像以成丈九而相好不差又有大錢二枚見衣條上竟不消鑠其年九月欲移像過寺未移前淮中估客每夜輒聞大橋上數百人修道路往視不見人俄而像度光彩輝煥觀者莫不歸心又東都記云秘書省內著作院後有梁武帝及名臣沈約范雲周興嗣已下三公數十人銅像初梁武帝登極乃立私宅為寺寺內有此像後

長慶中李千里為明堂採木使舩載至東都置於省內
置明慶寺後閣舍人王曇明造去縣十八里寺內有泉
水清澈陳梁已前嘗取供御愈疾寺碑太子舍人陳昭
之文

七年夏四月乙卯太子納妃赦大辟已下罪五月己亥
詔復置宗正太僕大匠鴻臚等卿又增太府太舟充為
十二卿六月辛酉復建修二陵周迴五里改陵監為陵
令七月壬辰置童子奉車郎置涅槃寺在縣北二十里

沙門僧寵造峯頂又有翠微寺天晴日暖望見廣陵城
在目前水陸之遠蓋二百里前潤州畢構因行屬城造
於山頂勒石為銘

八年正月詔能通一經始末無差許以敘錄

九年新作緣淮塘北岬起石頭迄東冶南起後渚離門
連于三橋三月己丑輿駕幸國子學親臨講席賜祭酒
已下帛有差四月丁巳選尚書五都令史革用士流是
歲置本業寺西去縣五十里比丘淨潔造在蔣山里

十年春正月親祠南郊六月異蓮一莖三花生樂遊苑
九月丙申天西北隆隆有聲赤氣下至地冬十二月山
車見於臨城縣庚辰馬仙琕大破魏軍斬馘十萬克復
朐山是歲初作宮城門三重及開二道置解脫寺在縣
西南六百里武帝為德皇后造大清里內

十一年二月新昌濟陽二郡野蠶成蠶癸丑齊宣德太
妃王氏薨

十二年正月詔掩骼埋胔二月辛巳新作太極殿改為

十三間四月京邑大水六月癸巳新作太廟增基九尺
庚子太極殿成

十三年二月丁亥興駕躬耕藉田孝悌力田增爵一級
老人星見七月乙亥立皇子綸為邵陵王繹為湘東王
紀為武陵王八月作浮山堰時都下訛言有魃鬼取人
肝肺以祠天狗百姓大懼置勸善寺去縣西北十八里
帝為賢志造

十四年正月乙巳皇太子冠大赦天下賜為父後者爵

一級王公以下有差停遠近上慶禮

十五年詔以兵騶奴婢六十者皆為庶人

十六年春正月辛未祀南郊詔尤貧家勿收今年三月
調無田業者所在量宜賦給及優蠲產子之家恤理冤
獄并振孤老鰥寡不能自存者二月辛亥耕藉田甲寅赦
罪人三月丙子敕太醫不得以生類為藥公家織官紋
錦飾並斷仙人鳥跡之形以為褻衣裁剪有乖仁恕於
是祈告天地宗廟以去殺之理欲被之含識郊廟牲牷

皆代以麵其山川諸祀則否時以宗廟去牲則為不復
血食雖公卿異議朝野喧囂竟不從冬十月宗廟薦羞
始用蔬果

十七年春二月癸巳雍州刺史安成王秀薨甲辰大赦
三月丙寅改建安郡王偉為南平王

十八年四月丁巳大赦天下七月甲申老人星見置惠

日寺

原案西南去縣二里阮翻捨宅造之在建西尉定陰里舊說云大同八年丹陽尹王齡造今在縣東

二里考其二跡不同此惠日寺是宋之禪林寺王修儀為尼淨秀立精舍新蔡公主為佛殿泰始三年明帝助

修號曰禪林濟惠文起房如此之狀歷歷明矣隋末亂離並從毀壞唐初杜伏威與輔公祏等共修殿內丈六金像并左右侍者始武德四年止六年正月十五畢功寺西廡禪林寺亦併入禪林之域其年公祏背叛七年李孝恭來討為軍火所及貞觀七年始移加惠日之名於此矣

十九年春正月改天監十九年為普通元年

普通元年大赦天下丙子日有蝕之扶南高麗遣使貢獻三月丹滑國貢獻四月河南國貢獻七月江淮海三瀆並溢九月乙亥夜有星晨見東方光爛如火是歲魏明帝正光元年也置大愛敬寺西南去縣十

八里武帝為太祖文皇帝造大通四年又造一丈六尺旃檀像量之剝二尺成丈八形次衣文及手足更重量又剝一尺五分至大通五年寺主僧洽重量又剝七寸即是長二丈矣大同四年移入大殿勅主書

吳文寵更量又剝五寸凡五度量即長二丈七寸

豈非精誠所感耶置永明寺西北去縣五十里

原案

寺記南平襄王造大唐武德六年廢上元二年五月奉勅重造

置果願尼寺西南

去縣五十里東陽太守王均造須陀寺去縣十七

里

二年春正月辛巳祠南郊詔置獨孤園以恤孤幼戊子
大赦二月辛丑祠明堂四月乙卯改作南北郊丙辰詔
曰平秩東作義不在南因徙籍田於東郊外十五里五
月癸卯琬琰殿火延燒後宮三千餘間八月丁亥始平
郡石鼓村地自開成井方六尺六寸深二十二丈十二
月百濟新羅遣使貢獻以百濟王餘隆為寧東大將軍
三年五月詔公卿百寮各上封事連帥郡國舉賢良方

正直言之士八月甲子婆利白題國遣使貢獻十一月
造猛信尼寺西北去縣五十里後閣主書高僧猛造在
鋪山西北梁紹泰二年廢上元二年勅令重造福靜寺
西北去縣六里尼修義造

四年十二月給事王子雲議鑄錢狼牙修國遣使貢獻
五年六月乙酉龍鬬于曲阿陂西行至建陵所過樹木
皆折地開數十丈征北將軍元澍率衆侵魏置衆造寺
西南去縣五十里後閣舍人吳慶之造置善覺尼寺在

縣東七里穆貴妃造其殿宇房廊剝置竒絕元帝繹為
寺碑

六年正月魏徐州刺史元法僧以城來降封始興郡王
七年正月詔在位郡縣各舉所知凡是清廉咸須聞薦
十一月河南高麗林邑滑國並遣使貢獻

八年正月甲戌大赦改元

大通元年辛未祀南郊詔流亡者復其宅業蠲役五年
尤貧者勿令出今年三調孝弟力田賜爵一級帝創同

泰寺寺在宮後別開一門名大通門對寺之南門取反

語以協同泰為名帝晨夕講議多遊此門寺在縣東六

里

原案輿地志在北掖門外路西寺南與臺隔抵廣莫門內路西梁武普通中起是吳之後苑晉廷尉之地

遷於六門外以其地為寺兼開左右營置四周池塹浮

圖九層大殿六所小殿及堂十餘所宮各像日月之形

禪窟禪房山林之內東西般若臺各三層築山構隴亘

在西北栢殿在其中東南有璇璣殿殿外積石種樹為

山有蓋天儀激水隨滴而轉起寺十餘年一旦震火焚

寺唯餘瑞儀栢殿其餘略盡即更構造而作十二層塔

未就而侯景作亂

帝為賊幽餒而崩

帝初幸寺捨身改普通八年為大通

元年五月丙寅成景雋剋臨潼竹邑十月庚戌魏東豫

州刺史元慶和降十一月丁卯蕭藻為都督鎮渦口侵魏是歲林邑師子高麗等國各遣使貢獻置園居尼寺北去縣四十三里大通四年舍人袁顥造

二年二月築寒山堰四月戊戌魏爾朱榮廢君殺主胡太后臨朝時魏大亂魏王子北海臨淮汝南等並割地來奔又郢州北青州南荊州皆以地來降十月帝以魏北海王元顥為魏主令東宮直閤將軍陳慶之衛兵以送還北魏豫州刺史鄧獻以地降

三年十月改中大通元年大赦賜孝悌力田爵一級夏
四月癸巳陳慶之拔魏梁城進屠考城擒魏濟陰王暉
業五月又進剋虎牢魏莊帝出居河北元顥入洛陽僭
號建元元年稱建武皇帝六月都下疫甚帝於重雲殿
為萬姓設救苦齋以身為禱九月辛未幸同泰寺設四
部無碍大會上釋服御法衣行清淨大捨以便省為房
用素床瓦器乘小車私人執役甲午陞法座為大衆講
涅槃經癸卯群臣以錢億萬奉贖皇帝衆僧默許乙酉

百辟詣寺東門奉表請還宮三請乃許帝三答書前後
並稱頓首十月己酉又大會設四部道俗五萬餘人會
畢帝御金輅還宮御太極殿大赦十一月盤盤蠕蠕國
並遣使朝貢置禪巖寺西北去縣三十五里大通元年
嚴祛之造貞觀六年廢上元二年勅重造

二年四月癸丑幸同泰寺六月林邑扶南遣使貢獻八
月幸德陽堂

三年四月己巳太子統薨謚曰昭明六月癸丑立昭明

太子子歡譽並為郡王是月丹丹國使貢獻七月乙亥立晉安王綱為皇太子大赦賜為父後者爵一級忠孝文武清勤並如之庚寅皇宗族有服屬者並賜湯沐食邑九月狼牙修國遣使貢獻是歲吳興生野稻饑者賴焉十一月幸同泰寺講般若經十二月魏渤海王高歡舉兵於信都別奉渤海太守元朗為天子改元號中興其年二月爾朱隆等已立獻文孫廣陵王元恭於洛陽改元號普泰

四年二月封諸王嫡子為王庚子皇子邵陵王綸有罪
免為庶人是日高麗平爾朱氏廢元恭以酖殺之謚曰
節閔年三十五又中興帝元朗自以疎屬遜位別邸高
歡立孝文孫平陽王修於洛陽改元永興又改永熙七
月甲辰星殞如雨十月侍中領國子博士蕭子顯表置
制旨孝經助教一人生十人專通上所釋孝經義十二
月高麗遣使朝貢是歲魏相高歡以女妻孝武帝元修
為后

五年正月辛卯祠南郊忽聞異香三隨風至及行事奏樂迎拜拜畢有神光圓照滿壇上五色食頃乃滅戊申京師地震己酉長星見五月戊子京師大水御道通航海南波斯盤盤遣使朝貢置法苑寺北去縣五十里

葉寺

記大通五年張文開造一名廣化寺
貞觀六年廢上元二年奉勅重造

六年二月親耕籍田大賜孝悌力田三月百濟遣使貢方物四月丁卯以信都將軍元慶和率衆北侵魏閏八月魏孝武帝西入關都長安以宇文泰為丞相孝武又

與文泰不平至十一月遇魃崩泰立孝文孫南陽王寶矩為文帝初魏武入關高歡立孝文曾孫清河王亶世子善見都鄴改元天平號東魏魏於是始分為兩十二月西南有雷聲二

七年正月戊申大赦改元

大同元年高麗丹滑波斯等國朝貢壬戌上幸同泰寺鑄銀像十月黃塵如雪十二月北梁州刺史蘭欽攻漢中魏梁州刺史元羅降是歲西魏文皇帝大統元年置

頭陀寺東北去縣二十二里

原案寺記舍人石與造其寺在蔣山頂第一峯殿後

有泉井與江淮水通隨潮水增減非常靈異累世仍舊

萬福尼寺北去縣十八里

吳僧暢造本願尼寺湘州刺史蕭環造巖栖觀去縣東六十里貞觀六年併入洞玄觀

二年正月詔求讜言及令文武官舉士十一月己亥詔大舉兵北侵魏壬午幸同泰寺設無碍大齋雨塵如雪攬之盈掬大兵班師都下地生白毛長二尺壬申魏遣使來請和許之置慈恩寺東南去縣二十五里邵陵王

綸造普光寺東南去縣八十里安豐縣令張延造化成
寺東北去縣七十里江寧縣令陶道宗造興福寺東北
去縣一百里袁平造善業尼寺東北去縣五十里蕭恪
造寒林寺西北去縣三十五里常侍陳景造

三年四月辛丑夜朱雀門災壬寅大雨灰黃色七月東
魏遣人來聘閏九月使散騎常侍張臯報聘東魏冬地
大震年饑置一乘寺西北去縣六里邵陵王綸造在丹
陽縣之左隔邸舊開東門門對寺梁末賊起遂延燒至

金史卷之八
卷十七
陳尚書令江總捨書堂於寺今之堂是也寺門遍畫凹凸
花代稱張僧繇手跡其花乃天竺遺法朱及青綠所成遠
望眼暈如凹凸就視即平世咸異之乃名凹凸寺置玉
清觀西北去縣五十八里南康令驥哲造

四年三月河北蠕蠕國朝貢東魏人來聘七月散騎常
侍劉孝儀聘東魏八月甲辰詔淮南十二州飢饉逋租
宿債勿收九月閱武於樂遊苑十二月國子助教黃侃
表上禮記疏義五十卷置洞靈觀在縣南四十里陳宣

遠所造

五年春正月賜廬陵王等官階丁巳御史中丞叅禮儀
事賀琛奏今南北郊籍田往還並宜御輦不復乘輅二
郊請用素輦皆以侍中陪乘停大將軍及太僕詔付尚
書博議施行改素輦為大同輦八月扶南獻生犀十一
月魏人來聘遣侍中柳豹聘之是時都下訛言云天子
取人肝以飼天狗大小相驚日晚閉門持刀杖數月乃
止

六年二月己亥耕籍田五月己卯河南王遣使獻馬及
方物求經論十四條并請制所定涅槃經般若經光明
經講疏一百三卷七月東魏人來聘九月始興太守獻
嘉禾一莖十七穗

七年二月於宮城西立士林館延集學者宕昌蠕蠕各
遣使貢物百濟王求涅槃經疏及醫工畫師毛詩博士
並許之

八年正月安城郡劉敬躬反江州刺史湘東王繹遣中

兵叅軍討平擒送都下斬之十一月丙子詔所在役女
丁罷之是歲交州賊李賁攻刺史蕭諮奔越州

九年正月丙申地震生毛置江潭苑去縣二十里

原案地誌

武帝自新亭鑿渠通新林浦又為池開大道立殿宇亦名王遊苑未成而侯景亂

十年春李賁竊位交趾置百官號天德元年三月甲午
幸蘭陵庾子謁建陵陵上有紫雲覆久而乃散帝望陵
流涕所沾草木變色陵旁先有枯泉是時流水香潔辛
丑帝哭於修陵又於皇基寺設法會賜蘭陵老少位各

一階所經縣邑放今年租賦因賦還舊鄉詩己酉幸京
口登北固樓因改為北顧又幸迴賓亭宴帝鄉故老及
迎候者數千人各賜錢三千文五月辛州刺史盧子雄
兄弟被誅乃舉兵反廣州刺史蕭映討平之十一月大
雪三尺

十一年正月震華林園光嚴殿帝自貶拜謝上天累刻
乃止置履道寺西北去縣二十五里

原案注宣集貞威將軍給事後閣舍

人章法

置渴寒寺西北去縣二十五里

十二年正月改年為中大同元年

中大同元年曲阿縣建陵隧口石壁邪起舞有大蛇闔
隧中其一被傷奔走又青蟲食陵樹葉俱盡癸丑交州
刺史楊暕剋交趾嘉寧城李賁走入屈獠洞交州平三
月庚戌幸同泰寺講三惠經乃捨身為奴四月皇太子
已下羣臣出錢億萬奉贖是夜同泰寺為天火所燒略
盡六月辛巳天有聲如雷及風水相薄之音七月甲子
詔今已後有犯罪非大逆及殺父母已下並勿坐丙寅

詔通用足陌錢甲午渴盤阨國貢方物

二年正月改元

太清元年東魏高歡薨二月白虹貫日庚辰東魏司徒
濮陽王侯景率河南十三州地歸降使行臺丁和奉表
帝許之壬午以景為大將軍封河南王大行臺承制如
鄧禹故事甲辰以司州刺史羊鴉仁桓和等率兵應接
侯景乙巳帝陞光嚴殿講三惠經又捨身羣臣以億萬
奉贖僧衆默許百辟詣鳳莊門上表請帝帝三答皆稱

頓首丁亥服袞冕還宮幸太極殿如初即位之禮是日
神馬出太子獻寶馬頌六月以雍州刺史鄴陽王範為
征北將軍總督緣邊初附之州以大將軍侯景為錄尚
書十一月軍至寒山為後魏慕容紹宗大敗之蕭明被
執置幽巖寺北去縣四十里永康公主造

原案釋法論
集牛頭山佛

窟寺大毗曇師傳云承聖二年法師入秣陵香山始創
舍名曰幽巖與佛窟相去十里毗曇所立不云永康矣

立儀香尼寺西北去縣五十里宮獲造

二年正月朔兩月相承如鉤見西方詔大臣各舉所知

己亥交州刺史楊暕司馬陳霸先破屈獠洞斬李貴傳
首京師六月天裂於西北長十丈闊二丈光出若電聲
動如雷七月使常侍謝琨於東魏結和八月侯景敗歸
自壽陽舉兵反十月攻下馬頭破歷陽自採石臨江詔
邵陵王綸討景景自橫江渡於採石辛亥至京師十一
月邵陵王入援京師乙酉戰於玄武湖東而保愛敬寺
為賊所破十二月戊申天西北裂有光如火時柳仲禮
入援京師以仲禮為都督置靈隱寺西北去縣五十里

炁待公所造

三年三月丁巳侯景破仲禮于青塘壬午火守心乙酉
太白晝見三月乙卯景攻陷宮城縱兵大掠己巳景自
矯詔為大丞相四月己酉高祖以所求不供以憂憤寢
疾五月丙辰帝幽餒而崩于淨居殿年八十六辛巳遷
大行皇帝於太極殿冬十一月追尊為武皇帝廟號高
祖乙卯葬于修陵高祖自捨身後或書經坐禪晝日不
食又於元光殿坐師子座講金字經文於王明殿施素

牀瓦器以用性純孝年六歲獻皇后崩水漿不入口三日哭泣哀苦有過成人及文皇帝崩初為齊王諮議在荊州聞問便投地絕漿及居宸極手不釋卷常至於夜燈燭不絕光著孝經義周易六十四卦二繫文言序卦等義毛詩問答尚書大義中庸講論老子疏凡二百餘卷並正先儒之迷開古聖之旨并撰吉凶軍賓嘉五禮凡一千餘卷又製涅槃大明三淨等經義疏數百卷又撰通史製讚序凡六百卷天性銳敏下筆成章又著文

集一百卷又撰金策三十卷明諸醫藥卜筮陰陽律候
占決並善隸書解騎射弓馬莫不奇妙衣服儉素冬衣
木綿一冠二年一被三年年五十九即斷房室六宮無
錦繡之飾不飲酒不聽音樂開蕩蕩之王道革靡靡之
商俗鼓扇玄風興重儒素然不能息末敦本斲雕為樸
慕名好事崇尚浮華抑揚孔墨留連釋老侯景立皇太
子綱為簡文帝

太宗簡文皇帝

簡文帝字世續諱綱武帝太子太清三年五月武帝崩
侯景立帝改元

太寶元年

二年八月侯景廢帝立豫章王棟使呂季略送詔令帝
寫之帝書至先皇念神罷之重思社稷之固越升非次
遂主震方嗚咽不能自止賊衆皆為掩泣十一月帝遇
害謚簡文帝廟號太宗年四十九豫章王棟即位其年
十一月景又廢帝自稱漢

案豫章王棟即昭明太子子
歡之子歡之子長曰棟次曰

閏小曰穆景既廢帝自立為漢王改太始元年
立一百日而月太始元年是太寶二年也六月征

南將軍陳霸先從南康下頓西昌時湘東王繹遣征東
將軍王僧辯督衆軍下討侯景師次湓城陳霸先率杜
僧明侯安都等甲兵三萬將往會焉先遣長史沈袞奉
表江陵勸湘東王進位十一月王授霸先都督東陽新
安會稽臨淮永嘉五郡軍事平東將軍揚州刺史

三年正月王僧辯等諸軍發湓城與霸先會于白茅津
共登洲立壇刑牲飲血盟約同心併力進討侯景詞理

悲切泣下沾衣詞曰賊臣侯景逆天無狀構造姦惡違背恩義掠我國家毒害生民移改宗廟我高祖聰明睿聖光宅天下劬勞兆庶五十餘年侯景以窮見歸撫之如子故我高祖於景何薄百姓於景何辜而景肆長戟以凌盛朝廷騁鋸牙而殘害百類皇枝襁褓之上皆窮刀極俎豈有人臣忍聞此痛臣僧辯霸先荷湘東王泣血之寄摩足之恩抽腸瀝膽誓誅姦逆雪天地之怨耻報君父之仇讎同心叶和罔有違戾若有欺負明靈殛

之二月大軍進姑孰先鋒次蔡洲侯景登石城望官軍之盛不悅密謂左右曰彼軍上有紫氣不可當也乃使盧暉恪守石頭自於石城北築數壘而據高巔以拒霸先霸先於石城西北連營立柵至落星山左右俱進霸先謂軍吏曰善用兵者如常山蛇令其救首尾困而無暇於是不日平定侯景矣陳霸先進屯京口

案梁書云王僧辯破侯景

景之走也郭元建舉廣陵以歸歟請降景子鑒奔清江說元建曰我曹梁氏讎豈能相活耶遂與建謀反降北齊齊使將軍辛術來援廣陵霸先將欲往廣陵納軍至歐陽闡元建已投北齊遂還軍京口

世祖元皇帝

元帝諱繹武帝子先封湘東王荊州刺史大寶二年即
位於江陵改號承聖元年以陳霸先為司空南徐州刺
史岳陽王蕭詧引西魏軍寇江陵三年十月西魏將于
謹圍江陵十一月城陷帝為魏人所殺年四十七

敬皇帝

敬皇帝諱方智元帝第九子先封晉安王江州刺史霸
先僧辯以承聖三年十二月迎入建康即位改元紹泰

元年是月蕭譽立於江陵號太安元年稱後梁五月北齊送蕭懿第五子貞陽侯淵歸主梁嗣七月僧辯納之立為帝以敬帝為太子霸先聞之遣使四諫不從霸先憤密謂所親曰武皇盤石之宗遠布四海至於剋雪讎耻寧濟艱難唯孝元而已功業茂盛前代未聞我與王公俱受重寄聲猶在耳語未絕音豈期一旦便有異同嗣主武皇之孫元帝之子海內矚目天下宅心竟有何辜生致廢黜遠求夷狄假立非次觀其此情亦可知矣

乃密與徐度侯安都周文育等謀反水陸俱進襲王僧
辯使周文育率勇士夜至石頭北踰垣而入霸先自引
軍入南門左右告僧辯外有軍僧辯驚起未及召軍主
而周文育與僧辯子頽戰於庭霸先攻南門而入僧辯
大敗窘急登城南樓霸先因風縱火僧辯就擒縊而斬
之遂廢貞陽侯而復方智為帝改紹泰元年進霸先都
督中外軍事車騎大將軍揚州牧司空如故班劍鼓吹
時義興太守章載震州刺史杜龕等聞僧辯之誅遂舉

兵反於吳興霸先自往討之秦州刺史徐嗣徽南豫州
刺史任約等聞霸先不在密招北齊舉兵乘虛渡江掩
至闕下侯安都拒之乃據石頭霸先聞之卷甲還都十
一月北齊遣兵千渡江據姑孰又遣安州刺史翟子崇
劉士榮等及淮州刺史柳達摩以兵一萬於湖墅以米
三萬石馬千匹潛渡據石頭霸先命侯安都水軍夜襲
湖墅燒齊船舫令周鐵虎率舟師斷齊運輸霸先自領
精騎出西明門以襲齊軍十二月盡命衆軍分部對治

城以舩渡兵攻其水南二柵柳達摩拒淮據之霸先督
衆軍疾戰縱火燒柵煙塵漲天齊人敗走使侯安都水
軍追破嗣徽嗣徽單舸走達摩等各率軍入保石頭霸
先於石頭南北岸絕其汲路又堙塞城東門城中諸井
無水水一合質米一升米一升質絹一匹或炒米而食
之達摩謂其衆曰我在此聞謠言云石頭擣兩襠擣青
復擣黃昔侯景著青色已倒於此今吾徒衣黃豈不是
謠言驗乎庚辰達摩請和霸先偽許之與城外盟約任

其將士南北辛酉霸先陳兵石頭南門送齊人北歸及至皆殺之二年三月齊將蕭軌東方老裴英洛州刺史李希光并任約徐嗣徽衆軍十萬出柵口向梁山頓軍蕪湖五月丙申齊軍至秣陵故城霸先遣周文育屯方邱徐度屯馬牧霸先自率宗室王侯朝臣等立壇於司馬門外仁虎闕下刑牲告天以齊人背約食言慷慨涕泗交流士卒觀者益加奮勇辛丑齊軍於秣陵東跨淮上橋引兵度自方邱進及倪塘游騎至城下震恐霸先

潛以兵三千配沈泰度江襲齊軍行臺趙彥琛於瓜步
獲其舟粟之輜重是日天子總羽林禁兵頓長干寺六
月甲辰齊兵度鍾山龍尾據幕府山霸先又遣錢明水
軍出江乘斷齊人運糧齊人大饑殺馬以食之壬子齊
軍至玄武湖西北將屯北郊壇霸先引軍自覆舟山東
移於郊南與齊人對陣其夜大雨雷電暴風拔木平地
水深一丈餘齊軍日夜坐立泥中懸渴而爨足指皆爛
而城中及潮溝北水退路乾官軍常得乾地時食盡霸

先懼軍人皆給麥餅兵士甚餒會陽倩自東陽送米二千石鴨千頭霸先乃炊飯煮鴨誓軍士一戰乃尅之及旦身計裹糧肉數嚮畢自率麾下於幕府山南吳明徹沈泰等衆軍首尾齊舉縱兵大戰侯安都自白下斷其後齊師大潰相藉死者不可勝計生執徐嗣徽斬之以徇追奔至江乘攝山擒蕭軌東方老裴英李希光王僧智等四十六人皆誅之其餘軍士得竄至江者自廬龍縛筏以濟中流筏廢溺死者不知幾極流屍至京口翳

水彌岸唯任約王僧愔獲免丁巳霸先出南州燒賊船
乙未斬徐嗣彥傳野猪于建康市誅齊將等於城下改
元

太平元年秋九月天子進霸先位丞相錄尚書事揚州
刺史義興郡公

二年正月又加霸先班劍三十人置丞相別榻霸先房
從悉追贈之二月廣州刺史蕭勃反浚江而下南江州
刺史余孝頃以兵應之霸先令周文育討平之八月甲

午進霸先位太傅加黃鉞劔履上殿入朝不趨贊拜不
名給前後羽葆置皂輪九月進總百揆封十郡為陳公
備九錫之禮授璽紱遠遊冠位在諸侯王上陳國置官
屬一依舊式十月進爵為王加冕旒建旌旗出警入蹕
乘金根車駕六馬備五時副車置旄頭雲罕舞八佾設
鍾簾宮懸陳臺並依齊末故事辛未敬帝禪位於陳王
乃命太尉王通長史王瑒奉皇帝璽紱受終之禮一依
唐虞故事敬帝方智遜位別宮霸先三讓羣臣固請以

太平二年十月乙亥霸先設壇于南郊即皇帝位柴燎告天禮畢輿駕還建康宮臨太極殿大赦改永定元年奉帝為江陰王行梁正朔服色一依前典

史臣曰唐鄭國公魏徵曰梁太祖固天攸縱聰明稽古道亞生知學為博物允文允武多才多藝爰自諸生有不羈之度屬昏允肆虐天倫及禍糾合義旅將雪家冤曰紂可伐不期而會龍躍樊漢電激湘郢剪離德如振槁取獨夫如拾遺其雄武大略固無得而稱焉既縣白

旗之首方應皇天之睠今乃布德施惠悅近來遠大修
文教盛飾禮容聲振寰區澤浸遐裔干戈載戢凡數十
年濟濟焉洋洋焉魏晉已來未若斯之盛也或終夜不
寢終日不食非全道以制物唯飾智以警愚卑心遺榮
虛廁倉頭之位高談脫屣終戀黃屋之尊夫人之大欲
在乎飲食男女至於軒冕殿宇非有切身之累高祖屏
除嗜慾眷戀軒冕通於所難而滯於所易可謂神有所
不迫智有所不及矣及夫精華稍竭鳳德已衰惑於聽


受權在邪佞儲后百辟莫能盡言躁險之心暮年踰甚
利而後動懷諫違卜開門揖盜棄好即讎釁起蕭牆禍
成戎羯身殞非命災被億兆衣冠斃於鋒鏑之下老幼
粉於戎馬之足膽彼秦離痛深周廟永言麥秀悲甚殷
墟自古以安為危既成而敗顛覆之速書契所未聞也
偽漢侯景字萬景父標本朔方人移家於鴈門少驍勇
有膽力魏末遷北鎮戍兵稍立功効魏胡太后臨朝朝
政紊亂天柱將軍爾朱榮自晉陽入殺胡后景以私衆

見榮甚奇之即委之典軍事會榮南逼命景先驅以功
拜定州刺史始魏相高歡微時與景相友好及歡入洛
誅爾朱氏景復以衆歸之仍為歡委用景殘虐馭軍嚴
整然破掠所得財物皆頒賜將士故人人咸為之用命
所向多捷後為河南道大行臺位司徒言於歡曰請兵
三萬橫行天下要須濟江縛取蕭衍老公作太平寺主
歡壯其言使擁衆十萬專制河南仗任若已之半體及
歡疾篤謂子澄曰侯景狡猾多計反覆難知我死後必

不為汝用乃以書召之景懼禍乃以梁太清元年遣行臺郎中丁和上表請降梁武封為河南王又遣行臺左丞王偉詣闕請立元貞為魏主梁乃封貞咸陽王資以乘輿副御高澄又遣慕容紹宗追破景入渦陽食盡士卒散景乃收散卒得八百人奔壽陽爾後徵求稍闕表疏跋扈鄱陽王範鎮合肥司州刺史羊鴉仁素稱景有異志梁相朱异曰景數百叛虜何能為事抑而不奏景知臨賀王正德怨望朝廷乃密使要結以為內應八月

景發兵濟自歷陽高祖命邵陵王綸督衆軍巡江防遏
蕭正德屯丹陽至是率兵與景會合景乘勢遂至闕下
西豐公大春棄石頭走景遣將于子悅據之景乃立正
德為帝於儀賢堂改年曰正平正德拜景天柱將軍以
女妻之又攻陷東府城城內文武百官擲身而出使交
兵殺之死者三千餘人又起土山以臨臺城綸馬步三
萬以據鍾山景於覆舟山列陣南安侯駿衆退軍亂敗
績十二月景引玄武湖水灌臺城闕前御街並為洪波

燒劫府寺營衛市肆郭區內外居人略盡湘東王世子
方矩李遷哲羊鴉仁任尊等援軍四方雲合衆號百萬
景乞和宣城王大噐僕射王闕



建康實錄卷十七

欽定四庫全書

史部

建康實錄卷

十八至二十

詳校官編修_臣李潢

編修_臣裴謙履勘

總校官進士_臣朱鈐

校對官中書_臣陳本

謄錄監生_臣韋鴻勳

欽定四庫全書

建康實錄卷十八

唐許嵩撰

梁

后妃傳略

太祖獻皇后張氏諱尚柔范陽方城人祖惠宋濮陽太守母蕭氏即文帝從姑宋元嘉中嬪於太祖生長沙宣武王懿永陽昭王敷次生高祖初后嘗於室中忽見庭

前菖蒲花開光采照灼非世所有后驚問左右左右不見后曰嘗聞見者富貴因取吞之是月生高祖將產夜后見庭中衣冠陪列焉次生衡陽宣王暢義興昭長公主令嫔宋明帝太始七年殂於秣陵同夏里合葬晉陵武晉縣東山天監元年五月追尊號為獻皇后父穆之字思靖晉司空華六世孫官止交趾太守

高祖德皇后郗氏諱徽高平金鄉人祖紹宋祭酒父燧太子舍人初后之母宋文帝女尋陽公主方孕夢人告

云當生貴子及生后有赤光照室后幼聰明善隸書讀
史傳女工之事無不閑習高祖娉焉生永興公主玉珽
永世公主玉瓘永樂公主玉環高祖在雍州后殂於襄
陽官舍年三十二高祖即位追為德皇后后性妬忌及
終化為龍入後宮井中通夢於帝或見形光彩照灼帝
體不安龍輒激水騰湧於是井上設衣服百味祠之故

帝竟不立后

案東京記皇城西南洛水北有分穀渠至隋朝有龍天王祠俗傳梁武帝郗后性妬

忌武帝初立未冊命因忿懣乃投殿庭井中衆赴井救之已化毒龍煙焰衝天人莫敢近帝悲歎久之乃冊為

龍天王使井上立祠朱粉塗飾加以雜寶每有所御必厚祭之巡亙洒掃自梁歷陳享祀不絕陳滅乃遷其祠於京城道德寺大業初又移於此地置祠祠內有星辰日月閭羅司命五岳四瀆大龍神象蔣州沙門法濟嘗住祠中以事龍天王神濟有二豎子一善吹笙一善方響每日以朝暮作樂濟為神所感著衣鼓舞而不自覺今向北即上陽宮也

太宗簡皇后王氏諱靈賓瑯琊臨沂人祖儉后幼而柔明叔父暕見曰吾家女師也天監十一年拜晉安王妃生哀太子大器南郡王大連長沙公主妙碧大通三年拜太子妃太清三年二月薨於永福省年四十五其年

太宗即位追尊為后葬莊陵父襄字思叔高祖受禪遷中書令高祖造愛敬寺襄莊在寺側有田八十頃晉王導賜田也從求不得遂估市評田價以還直終吳興太守

高祖丁貴妃諱令光本譙國人居襄陽妃生於樊城有神光之異紫氣滿室故以光為名高祖臨襄州丁氏因人聞高祖納焉時年十四貴妃生有赤誌在左臂治之不滅至是無何忽失所在嘗於供養經案側髣髴若見

有神人心異之高祖起義初生昭明太子貴妃與太子留在雍州京邑平乃還京師天監元年為貴妃位在三夫人上居顯陽殿太子定位奏備典章言則稱令貴妃性不好華飾仁恕接下皆得歡心普通七年薨年四十二太宗即位追尊穆太后父仲遷官至兗州刺史

高祖阮修容諱令羸本姓石會稽餘姚人初齊始安王遙光納之敗後始入東昏宮高祖平定京師納為嫔女天監七年八月生元帝尋拜修容大同六年六月薨于

江州年六十七元帝追尊文宣皇后

孝元徐妃諱昭佩東江剡人祖孝嗣太尉文忠公父混侍中初為湘東王妃生世子方矩益昌公主含貞徐妃無容質帝三二年一入房妃怨之又以帝眇一目後每帝至必為半面粧帝大怒出妃而譴死之

太子諸王傳略

昭明太子諱統字德施小字維摩高祖長子母丁貴嬪以齊中興元年生于襄陽天監元年十一月立為太子

生而聰惠三歲受孝經論語五歲徧讀諸經了義二年
五月始出居東宮恒不樂高祖知之每五日一朝多便
留永福省八年於壽安殿自講孝經十四年正月朔旦
高祖臨軒冠太子於太極殿舊制太子著遠遊冠金蟬
翠綾纓至是詔加金博太子美姿容善舉止讀書數行
俱下能屬文下筆不加點崇信三寶徧覽衆經於宮中
立惠義殿專為注習之所召名僧自立三諦法義及貴
妃薨水漿不入口哭不輟聲高祖使顧協宣旨戒之體

素偉壯腰帶十圍至是減削過半自加元服高祖便使
省萬機內外百司奏事太子精於聽斷纖髮必曉法多
全宥天下稱仁接引才學討論墳籍于時東宮有書三
萬餘卷文學之盛宋以來未有之也性好山水於玄圃
穿渠築植更立池亭與朝士名賢游樂其中番禺侯盛
軌言此中宜奏女樂太子不答徐詠左思招隱詩曰何
必絲與竹山水有清音軌慙而止在東宮二十九年不
蓄聲樂每雨雪使親信周行閭巷貧困之家皆有賑賕

後忽疾恐帝憂常自勉力及因篤不許左右啟聞四月
辛巳薨時年三十一高祖幸東宮臨哭盡哀謚曰昭明

五月庚辰葬安寧陵

案梁書太子仁德素著及薨朝廷
驚惋男女奔走宮門號泣滿路岳

陽王即位追尊昭明皇帝陵在建康縣北三十五里所
著文集二十卷古今典故誥文言為正序十卷五言詩之

美者為英華集二十卷又
集文選三十卷行于世

哀太子太器字仁宗太宗嫡長子也普通四年五月丁

酉生大通三年封宣城王太宗即位六月立為皇太子

大寶二年八月逆賊侯景廢太宗并害太子時年二十

八太子性寬和神骨端凝在於賊手每不屈意賊以太子有器度憚之故見害元帝追謚為哀太子

愍懷太子方矩字德規元帝第四子也元帝承制拜為太子改名元良承聖元年為皇太子魏師陷江陵太子與元帝同被害敬帝追謚愍懷

陳吏部尚書姚察曰孟軻有言雞鳴而起孳孳為善者舜之徒也若乃布衣韋帶之士在於隴畝之間終日為之其利亦已博矣況乎處重明之位居正體之尊克念

無怠蒸蒸以孝大舜之德其何遠之

功臣

王茂字休遠太原祁人父天生宋末為將軍剋司徒袁粲拜為梓桐巴西二郡太守茂年數歲大父深見之曰此吾家千里駒也成門戶者必此兒也及長身長八尺美容質宋昇明末起家奉朝請拜襄陽太守高祖起義私於張弘策請立和帝高祖義師起每以茂為前驅建康平拜領軍將軍進司空加驍騎開府儀同三司江州

刺史薨年六十謚忠烈子貞秀嗣

曹景宗字子震新野人父欣之宋征虜將軍徐州刺史
善騎射好讀史書每讀穰苴樂毅傳輒放卷歎息曰大
丈夫當如此齊建武中為游擊將軍高祖起義景宗使
杜思仲勸高祖迎立南康王寶融於襄陽為高祖前鋒
累破諸城次江寧鼓噪而進至皂莢橋築壘及建康平
拜右將軍天監元年進平西將軍封竟陵侯大破魏軍
於鍾離封竟陵公拜侍中給鼓吹一部景宗為人自恃

性躁不能沉默出行嘗欲褰車帷慢左右輒諫以位望
重人所具瞻不宜如此景宗謂所親曰我昔在鄉里騎
快馬如龍與少年輩數十騎馳騁拓弓作霹靂怒發箭
如餓鴟叫平澤中逐麋鹿射之渴飲血飢食肉覺耳後
風生鼻頭火出此樂使人忘死不知老之將至今來揚
州作貴人動靜不得路行欲開車幔小人輒言不可閉
置車中如三日新婦悒悒使人無氣也七年遷安南將
軍江州刺史赴任卒於道謚壯子皎嗣

柳慶遠字文和河東解人伯父元景宋太尉慶遠累仕至齊初為魏興太守左轉襄陽令高祖臨雍州以綱紀辟為別駕從事慶遠謂所親曰方今天下將亂英雄必起庇人定霸其吾君乎因盡心協贊及義兵起居帷幄為謀主從軍東下身先士卒建康平入為侍中高祖受禪封雲安侯征虜將軍雍州刺史上餞之新亭高祖謂曰卿當衣錦還鄉朕亦無西顧之憂矣卒於官子津嗣初從父兄衛將軍世隆謂慶遠曰吾夢太尉以褥席見

賜吾亞台司適又夢吾以褥席與汝汝必光我門族至是慶遠亦繼世隆焉

蕭穎達蘭陵人齊光祿大夫赤斧第五子少好勇為西中郎外兵參軍高祖起義立和帝於江陵以穎達為冠軍隨高祖東下高祖受禪為前將軍冊陽尹九年遷衛將軍卒年三十四詔給東園秘器

夏侯詳字叔業譙國人年十六喪父廬於墓側嘗有不足雀來集廬戶間服闕太守殷琰召補主簿宋明帝太

始初琰以兵叛明帝使劉劭兵圍之詳為琰出說劉劭
劭退舍琰遂出降累遷至西中郎司馬新興太守高祖
起義西臺建以詳為中領軍凡國大事多決於詳高祖
圍郢城未下詳獻策略曰量我衆力度賊饑糧窺彼人
情觀之形勢若使賊衆食少故宜計月討之若食多力
寬宜悉衆攻之若使糧力俱足非國守所屈便宜散金
寶縱反間使彼智者不用愚者日進此魏武所以定大
業也天監元年高祖徵為侍中封豐城縣公尋進湘州

刺史尚書僕射金紫光祿大夫卒年七十四先是荊州城局參軍吉士瞻因浚萬人仗庫防火池得金革鈎隱起文曰錫汝金鈎既公且侯士瞻妻詳之兄女乃竊與詳詳喜佩之及是革命詳果封侯而士瞻不錫茅土

蔡道恭字懷儉南陽冠軍人父彬宋益州刺史道恭累戰功為南康王中兵參軍義兵起和帝即位遷右衛將軍天監初論功臣封漢壽侯司州刺史魏攻圍之相持百日内外相拒道恭疾篤以後事付兄子野其年五月

卒魏攻陷之後詔購其喪葬襄陽子澹嗣

楊公則字君翼冀州天水人父仲懷豫州刺史公則為宋義熙太守氏賊攻陷白馬城公則單馬逃歸為西中郎參軍蕭穎胄協同義舉以公則為輔國將軍率眾東下初荊州諸軍皆取其節度與高祖會平建康高祖立進號平南將軍封寧都縣侯假節北討至壽春疾篤卒年六十一諡曰烈侯子暕嗣

鄧元起字仲居南郡當陽人少有膽氣膂力過人性任

俠好施鄉里多附之以軍功遷武寧太守大破魏軍於義陽高祖起義率衆與高祖會夏口累進破城邑至京師築壘於建陽門外及建康平封當陽侯進號左將軍益州刺史入蜀平成都送益州刺史劉季連歸京師高祖大悅進元起平西將軍元起臨軍並稱善政口不論財色性能飲酒至一斛不亂及是蜀土大治翕然稱之二年以母老乞歸徵為右衛軍以西昌侯蕭深藻代之後深藻表其逗留以不憂軍事下獄自縊死子鏗嗣

張弘策字真簡范陽方城人文獻皇后之從弟弘策幼以母憂三年不食鹽菜兄弟友愛雖各有家室皆常同卧起不歸私室時稱為姜肱兄弟常從高祖入其室覺有煙雲之氣體輒肅然弘策由此特加敬異建武中弘策因問家國吉凶高祖曰明年都邑亂死人如麻齊之歷數自茲已矣梁楚鄧荆漢有英雄起焉弘策曰聖人何在為已富貴為在草澤中高祖笑曰光武有言安知非僕弘策起曰是天意也及高祖代曹武監雍州事弘

策心喜曰昔夜之言今將驗矣高祖笑曰舅勿多言乃從之雍五年齊明帝崩初詔高祖為雍州刺史乃表弘策為錄事參軍襄陽令高祖密為儲備謀猷唯弘策而已義師起以弘策為輔國將軍主領萬人督後部事建康平高祖使與呂僧珍入清宮掖封府庫遷衛尉卿洮陽縣侯東昏餘黨因運荻炬束仗得入南北掖門至夜作亂燒神獸門總章觀入衛尉府而害弘策年四十七高祖慟哭贈車騎將軍子緬嗣

庾域字司大新野人為梁州錄事參軍華陽太守魏攻南鄭州有空倉數十間域手自封題指目將士曰此中粟皆滿可支二年衆心乃安虜退高祖起義兵書招域為西臺領行選從高祖東下而和帝加高祖黃鉞天監初為巴西梓潼二郡守封廣牧縣子卒於郡

鄭紹叔字仲明滎陽開封人少結高祖為心腹高祖起兵為冠軍將軍從東下平江州留紹叔督糧運無闕天監初入為衛尉卿封東興縣侯初義陽為魏所陷司州

移鎮南鄭以紹叔為司州刺史至郡創立城郭修兵器
開田畝百姓安之入為左衛將軍司豫大中正疾篤詔
還家卒贈東園祕器子真嗣

呂僧珍字元瑜東平范人世居廣陵起自寒賤幼人相
之曰此兒有奇聲封侯之相及長身長七尺七寸容貌甚
偉事梁太祖為門下書佐及高祖臨雍州命為中兵參
軍委之心膂乃陰養死士歸者甚衆高祖按行起造多
伐竹木以茅覆之若山焉僧珍獨悟之私具櫛數千張

義兵起召僧珍及張弘策定議明旦發兵用為步兵校尉出入卧内宣通意旨及進每為前鋒平京邑高祖受禪拜冠軍將軍封平固縣侯入直中書省總知宿衛天監四年高祖欲賞之使為本州持節平北將軍南兗州刺史在任不私親戚從父兄子光以販葱為業而欲求官僧珍曰吾荷國重恩無以報効汝等自有常分豈可妄求叨越但當速返葱肆姊適王氏住在市西小屋臨路僧珍常導從鹵簿到其處不以為恥在州百日徵為

領軍十年病卒

柳惔字文通河東解人也父世隆齊司空惔仕齊為西戎校尉梁秦二州刺史高祖起義舉漢中應之高祖遷右僕射湘州刺史曲江侯卒子照嗣

韋叡字懷文京兆杜陵人漢丞相賢之後世為三輔著姓祖玄隱長安南山袁顗為雍州刺史引為主簿累遷上庸太守高祖起義督率郡人伐竹為棧倍道來赴有衆二十馬二百匹高祖見之喜曰他日見君面今日見

君心吾事就矣及至郢城顧叡曰棄騏驥而不乘焉遑
遑而更索即日拜江夏太守行郢州事及即位遷輔國
將軍豫州刺史封梁都子天監五年魏中山王元英圍
北徐州呂義之於鍾離高祖召叡與曹景宗救之叡乘
素木輿執白角如意以麾軍遂大破魏兵元英脫身走
軍人投水死者十餘萬所獲軍資牛馬不可勝數以功
封平北將軍宣武校尉雍州刺史叡初起義鄉里客陰
儁光泣以止叡叡還為本州儁光於道左祇候叡笑謂

雋光曰若從公言今乞食於路矣餉牛十頭徵入為散騎常侍入直殿省居朝廷恂恂未嘗忤視高祖甚禮敬之除護軍居家俸賜悉分親戚卒於家子放嗣

范雲字彥龍南都舞陰人善屬文能尺牘下筆成文父抗為郢府參軍雲起家為郢州西曹書佐齊竟陵王為丹陽尹用為主簿與高祖同遇於竟陵西邸及高祖起義定京邑東昏誅雲在城內銜命出高祖留之參帷幄拜黃門侍郎與沈約同心輔贊後遷侍中柴燎南郊還

雲參乘高祖昇輦謂雲曰朕之所謂慄乎若朽索之馭六馬雲曰亦願陛下日慎一日高祖善之是日遷常侍吏部尚書以佐命功封霄城縣侯以舊恩見拔初高祖常與雲同宿顧嵩舍嵩妻產有鬼在外曰此中有王有相雲起曰王當仰屬相以見歸因是盡心高祖高祖定東昏納其妃余氏頗廢政事雲與王茂切諫之曰昔漢祖居山東貪財好色及入關定秦財帛不取子女不幸范增以為其志大故也今明公始定天下海內想風望

聲奈何襲昏亂之跡以女德為累王茂因起拜曰范雲之言是望明公以天下為念高祖嘿然雲便疏請以余氏賚王茂高祖意許之後遷左僕射任寄隆重書牘盈案賓客滿門雲皆應對如流無所擁滯官曹文墨發摘如神及卒高祖臨之有集三十卷子孝才嗣

江淹字文通濟陽考城人少孤而好學沉靜少交遊善屬文起家宋南徐州從事宋建平王景素好士淹隨在南兖州廣陵令郭彥文犯罪下獄辭連淹言受金繫之

淹自獄中上書曰昔者賤臣叩心飛霜擊於燕地庶女
告天振風襲於齊臺下官每讀其書未嘗不廢卷流涕
何者士有一定之論女有不易之行信而見疑貞而為
戮是以壯夫義士伏死而不顧者也下官聞仁不可恃
善不可依始謂徒語今乃知之伏願大王覽停左右少
加矜察下官本蓬戶桑樞之人布衣韋帶之士退不飾
詩書以驚俗進不買名聲於天下日者謬得升降承明之
闕出入金華之殿何嘗不局影凝嚴側身局禁者乎竊

慕大王之義復為門下之賓備鳴盜淺術之餘預三五
賤伎之末大王惠以恩光顧以顏色實佩荆卿黃金之
賜竊感豫讓國士之分矣常欲結纓伏劍少謝萬一剖
心摩踵以報所天不圖小人固陋坐貽謗缺迹墜昭憲
身陷幽圉履影弔心酸鼻痛骨下官聞虧名為辱虧形
次之是以每一念來忽若有遺加以涉旬月迫季秋天
光沉陰左右無色身非木石與獄吏為伍此少卿所以
仰天搥心泣盡而繼之以血者也下官雖乏鄉曲之譽

然嘗聞君子之行矣其上則隱於簾肆之間卧於巖石
之下次則結綬金馬之庭高議雲臺之上次則虜南越
之君係單于之頸俱啟丹冊並圖青史寧爭分寸之末
競錐刀之利哉下官聞積毀銷金積讒糜骨遠則直生
取疑於盜金近則伯魚被名於不義彼之二才猶或如
是況在下官焉能自免昔上將之恥絳侯幽獄名臣之
羞史遷下室至如下官當何言哉夫以魯連之智辭祿
而不反接輿之賢行歌而忘歸子陵閉關於東越仲蔚

杜門於西秦亦良可知也若使下官事非其虛罪得其
實亦當鉗口吞舌伏七首以殞身何以見齊魯奇節之
人燕趙悲歌之士乎方今聖歷欽明天下樂業青雲浮
洛榮光塞河西洎臨洮狄道北距飛狐陽原莫不浸仁
沐義照景飲醴而下官抱痛圓門含憤獄戶一物之微
有足悲者仰惟大王少垂明白則梧邱之魂不愧於沉
首鵠亭之鬼無恨於灰骨景素得書即日出之尋舉南
徐州秀才對策高第少帝即位多失德景素專據上流

衆咸勸因此舉事淹每陳流言納禍二叔所以同亡抵
局銜怨七國於焉俱斃景素不納後高祖輔政聞其才
名召為駕部郎中時荊州刺史沈攸之作亂兵彊帝憂
悶謂淹曰天下紛紛若是君謂何如淹對曰昔項彊而
劉弱袁衆而曹寡羽令諸侯卒受一劍之辱紹跨四州
竟為奔北之虜此謂在德不在鼎公何疑焉且公雄武
奇略一勝寬容仁恕二勝賢能畢力三勝民望所歸四
勝奉天子而伐叛逆五勝彼且志銳而器小一敗也有

威而無恩二敗也士卒解體三敗也縉紳不懷四敗也
懸兵數千里而同惡相濟五敗也雖豺狼十萬而終為
我獲焉帝笑曰君談過矣高帝相國建為記室參軍而
掌詔冊表記典國史少帝即位為御史中丞多所糾彈
內外肅然明帝輔政謂淹曰自宋世已來不復有嚴明
中丞今日可謂獨步矣明帝即位遷祕書監及高祖義
軍入淹微服來奔高祖遷吏部尚書天監元年為左將
軍封臨沮縣伯謂弟子曰吾平生言止足之事亦已備

矣功名既立只欲歸身草莽其年疾遷金紫光祿大夫
卒淹以文章名顯晚年才思稍退時人謂之才盡所著
述百餘篇自撰為前後集并齊史十志並行於世淹嘗
為宣城守罷歸泊禪靈寺渚夜夢一人稱張景陽謂曰
前以一匹錦相寄今可見還淹探懷中得數尺與之此
人大恚曰卿得割截都盡顧見邱遲謂曰餘此數尺既
無用乞君淹自此文章蹟矣又嘗宿冶亭夢一人自稱
郭璞曰吾有筆在卿處可相還淹探懷得五色筆以授

之爾後為文不復麗美矣

後梁

中宗宣皇帝

中宗宣皇帝諱啓字理孫武帝之孫昭明太子統第三子幼好學善屬文尤長佛義特為武帝所賞封岳陽郡王知石頭戍事昭明薨武帝捨啓兄弟而立簡文帝綱內常愧之後以會稽人物繁富一郡之會遂以啓為東揚州刺史用慰其心啓以昆季不得為嗣常懷不平又

以武帝衰老朝多秕政有敗亡之漸遂蓄聚貨財門通
賓客招募輕俠折節下士有勇敢者故多歸焉中大同
元年除都督雍梁五州軍事校尉營以襄陽形勢之地
又武帝創基之所時平足以樹根本戰伐可以圖霸功
遂尅己勵節樹恩於百姓務修刑政志在綏養於是境
內稱治太清二年武帝以營兄河東王譽為湘州刺史
而張纘為雍州以代營纘恃其才望志氣輕驕輕營少
年州府迎候有闕營銜之及至鎮乃託疾不與纘相見

後聞侯景作亂頗凌蹙續懼為所擒乃輕舟夜遁將之雍部復慮譽拒之元帝時鎮江陵與譽各率所部領入援京師至江口屬侯景請和詔止援軍譽自江口將旋湘鎮續時在江陵貽梁元帝書曰河東今戴檣上水欲襲江陵岳陽在雍共謀不逞元帝甚懼乃鑿船沉米斬纜而歸令其子方等與王僧辨相繼攻譽譽告急詣譽譽大怒續將述職至州譽遷延不授替乃以西城居之軍民之政猶歸於譽譽以構其兄弟事始於續將密

圖之其將杜岸招續出奔續乃服婦人衣乘青布輦與親信十人出杜岸馳報營營遣兵討擒之乃率衆兵二萬騎千匹伐江陵以赴之元帝大懼乃遣參軍庾奐謂營曰正德以亂天下崩離汝復效尤將欲謂何吾家先宮遺愛故以汝兄弟見囑今以姪伐叔道復安在營謂奐曰家兄無罪屢見攻圍同氣之情豈可坐觀成敗叔父若顧先宮豈應若是如能追兵湘水吾便旋旆襄陽營攻江陵柵不尅其將杜岸懼營不振以其屬降於江

陵營衆大駭其夜遣歸襄陽營既與江陵構隙恐不能自固時西魏恭帝二年乃遣人稱藩於西魏請為附庸魏相周國公宇文泰會於丞相府東閤祭酒榮權使焉元帝使柳仲禮率衆圍襄陽營懼乃遣其妻王氏世子寮為質請救周公遣關麻楊忠等率兵援之楊忠擒柳仲禮於滌頭營乃獲安周公使營表嗣位營以未有璽命辭不敢周公令常侍鄭穆及榮權持節冊命營於襄陽陞壇受拜置百官承制恭帝三年三月營留蔡大寶

居守乃自襄陽朝西魏魏相周公宇文泰薨子覺嗣十
二月晦日魏恭帝禪位周王宇文覺稱後周號元年都
長安稱大周天王正月謂梁王來此欲相見乎遂召見
因說周王伐江陵周乃使太尉長孫儉萬紐于謹征江
陵戕元帝乃立誓為梁王居江陵東城資以一州之地
其襄陽之地統歸之於周誓稱皇帝即位於江陵改年
號

大定元年稱後梁追尊父統為昭明皇帝廟號高宗統

妃蔡氏為昭明皇后又尊其所生龔氏為皇太后立妻王氏為皇后歸為皇太子上疏於周明帝毓頻年稱臣用其正朔爵命服色自依梁典周明帝乃使梁王立統嗣居於東城號曰助防初平江陵營將尹德毅說營請周太尉長孫儉將軍萬紐于謹等為歡宴彼無我虞因伏武士執之於是分命德毅掩其營壘斬馘逋周俾無遺類惟江陵百姓撫而安之王僧辨之徒折簡可致然後朝服濟江入踐皇極此萬世一朝也晷刻之間大功

可立誓不從之曰卿之此策非不善也然周待我甚厚
未可背約若如卿計則鄧祁侯所謂人不食吾餘也既
而闔城長幼被虜入關反失襄陽之地誓乃追悔深恨
不用尹德毅之言以至於此又見邑居毀壞干戈日用
恥其威略不振常懷憂憤乃著改恥賦以見意誓在位
八年年四十四當後周武帝保定四年薨羣臣葬於平
陵謚曰宣帝廟號中宗誓少有大志不拘小節雖名猜
忌而知人善任撫下將士有恩能得其死力性不飲酒

安於儉素又惡見婦人雖相去之數尺遙聞其臭經御婦人之衣不復更著又惡見人毛髮所幸者必方便以避之著文集十五卷內典華嚴般若法華金光明義疏四十六卷並行於世疆土既狹居常怏怏每誦老馬伏櫪志在千里烈士暮年壯心不已未嘗不盱衡扼腕歎吒者久之遂以憂憤發背疽而薨

世宗孝明皇帝

世宗孝明皇帝諱歸字仁遠中宗第三子大定元年立

為太子八年宣帝崩太子即位號

天保元年春正月尊祖母龔氏為皇太后所生曹貴妃
為皇太妃至五年春正月陳湘州刺史華皎巴州刺史
戴僧朔來附乃請伐陳歸乃求周師勢援大為陳將吳
明徹所破徹進逼江陵引江水灌城明帝出頓紀南王
操合周軍共以擊之明徹遂退明帝乃復入江陵六年
即陳光太二年陳文帝弟安城王瑱廢少帝伯宗為臨
海王自立為宣帝七年八月陳又遣司空章昭達來寇

明帝與周將陸騰同破之以華皎為司空以僧朔為車騎將軍九年十年使華皎入周周以基平郛等數州歸於梁是歲周誅宇文護周改元建德十一年十二年周武廢佛道二教著短穿衣三十四五年周高祖武帝平北齊封齊天子高緯為溫國公傳國璽入周明帝入周賀平鄴周武帝厚加禮送十六年周武帝崩十七年周宣帝贊禪位於太子衍衍立是為靜帝十八年十九年周靜帝禪位於隋公楊堅堅封周帝為介國公二

十年是歲隋開皇二年隋朝營新都於隴首川是歲陳
宣帝頊崩太子叔寶立隋文帝遣使以禮聘明帝女為
晉王廣妃又以明帝子尚隋蘭陵公主遂通好焉後使
隋隋加禮相待特使謂梁主久滯荆楚未復舊都故鄉
之念良軫懷抱朕當振旅長江相送旋旆耳二十一年
陳之至德元年二十二年二十三年五月帝崩在位二
十三年年四十四葬顯陵謚曰孝明皇帝廟號世宗帝
性機辨有文學撫御能得其下懼心孝悌仁慈有仁君

之量四季祭享未嘗不悲慕流涕尤儉約御下既有方
境內共言其治邦國無事所著文集及孝經周易義記
及小大乘幽微並行於世

莒公諱琮字溫文性倜儻不羈博學有文義立為皇太
子天保二十三年五月帝崩即帝位改號廣運元年二
年率其臣下二百餘人朝隋隋文帝留之使武鄉公崔
弘度將兵攻江陵江陵不守帝叔父巖及弟瓛等舉居
人奔於陳隋拜琮為柱國將軍封莒國公自宣帝嘗即

位大定元年乙亥至琮廣運二年丁未凡三十三年營
子嶽巖岌岑俱為王歸子璵瑑璟珣瑒瑤並皆為王自
後梁之興蔡大寶為股肱王操為心腹魏益德尹正薛
暉許孝敬薛宣為爪牙甄元成劉盈岑善方傅淮褚珪
蔡大業典衆務張綰以舊齒歷顯位沈重以論學蒙厚
禮自餘多所獎拔咸盡其器任及明帝纂業親賢並用
為將相故保其疆土安於民人

後梁功臣

蔡大寶字敬位濟陽考城人父點梁尚書儀曹郎大寶少孤而篤學不倦能屬文誓初出第徐勉之薦為侍讀兼管記室誓莅襄陽遷咨議參軍及元帝伐湘東王譽使大寶於江陵元帝悅之使注所製玄覽賦三日而畢元帝大奇之及誓為梁王拜吏部尚書軍國之事咸委決焉及宣帝即位拜太子少傅明帝嗣位冊司空卒性嚴整文學詞贍內外誥令皆掌之人云宣帝有大寶猶蜀先主之孔明著文集三十卷撰尚書義訓

王操字子高其先太原晉陽人宣帝龔太后之外弟父景休臨川內史操性敦厚有籌略博涉經史初為帝外曹參軍及即位遷大將軍郢州刺史明帝即位授尚書僕射及陳將吳明徹為寇帝出頓南紀操巡撫將士莫不用命江陵獲全操之力也及卒明帝舉哀流涕曰天不使吾平蕩江表邪何奪吾相之速也

宋如周南陽人有才學容止詳雅為度支尚書如周面狹長宣帝嘗戲之曰卿何謂謗法華經如周蹶蹠自陳

不謗帝又言之如周不悟而出言告蔡大寶大寶知其
旨笑謂之曰君當不謗餘經止應不信法華法華云聞
經隨喜面不狹長如周乃悟如周素寬雅有才子希顏
最知名

袁敞陳郡人祖粲宋司空父士俊安城內史敞少有器
量博涉經史以吏部尚書使於周初主者以敞班在陳
使之下敞固不從命曰昔陳之祖父乃梁朝諸侯之下
吏棄忠與義盜有江東今之朝宗萬國以禮若使梁之

行人在陳使者之後恐彞倫失序非使臣之所望焉周武帝乃謂敞與陳使人異日而進使還稱旨遷侍中後隨琮入隋授譙州刺史

岑善方字思遠南陽人漢征南將軍舞陰侯彭之後祖惠甫齊南彭城太守父昶梁散騎常侍善方少立志操雅重名節為當世所許拜岳陽王記室參軍及宣帝即位累遷中書舍人與蔡大寶分典機務帝常推心焉拜吏部尚書數使於周稱旨拜驃騎大將軍儀同三司封

長寧公卒有子六人元之象之利之仕隋邯鄲令文本
最知名

建康實錄卷十八